



## CURAÇAO AIRPORT HOLDING TA YAMA 'COCO' BON BINÍ

Kòrsou – 23 di novèmber 2013

**Na number di komunitat di Kòrsou, Curaçao Airport Holding a traha un billboard kant'i kaminda di Kueba di Hato pa yama nos heroe nashonal Wladimir 'Coco' Balentien bon biní na kas. E bòrchi ku e título "Welcome home to our home run King" a keda desvelá djabièrnè 22 di november, den presencha di direktiva i empleadonan di Curaçao Airport Holding, i naturalmente di Coco Balentien i su amantenan.**

Na momento di e desvelo, direktor general di Curaçao Airport Holding (CAH), Maurice Adriaens, a dirigí algun palabra na Balentien i e demas espektadónan. Adriaens a bisa entre otro ku CAH ta sumamente kontentu i orguyoso di e logro di Wladimir Balentien. CAH ta kombensí ku representashon internashonal di nos dushi i balente isla chikitu, na e manera ku Balentien a demostrá, tin un balor sin igual no solamente den e ambito di deporte, sinó pa desaroyo di Kòrsou en general. "Huntu nos por realisá un posishon internashonal sentral i importante pa Kòrsou. Coco ta e ehèmpel bibu nos dilanti ku soñonan por i ta bira realidat. Curaçao Airport Holding ta kere firmemente ku kada un di nos siudadanonan na nan mes manera por hasi e mesun diferensha ku Coco a hasi na Hapon. Klaro ku no tur hende por dal home run manera Coco; pero nos kada un si tin e potenshal pa realisá nos propio ambishonnan, ni maske kon grandi òf inkreibel nan parse. Coco a demostrá esei!", segun direktor Maurice Adriaens. Despues di e desvelo, e beisbolista a klousurá e seremonia, dor di pone su firma riba e bòrchi den presencha di miembronan di prensa i otro interesadonan. Balentien a laga sa un bes mas ku e ta imensamente gradesido na henter pueblo di Kòrsou pa nan sosten inkondishonal.

